


# Alkitab Buat Bocah

## Nampilin



# Samson

## Orang

## Kuat

## Tuhan



Nyeng nulis: Edward Hughes

Nyeng bikin gambar: Janie Forest  
Alastair Paterson

Nyeng nyocokin: Lyn Doerksen

Nyeng terjemahin: Matheus Nalih Ungin

Dibikin buat: Bible for Children  
[www.M1914.org](http://www.M1914.org)

©2024 Bible for Children, Inc.

Perijinan: Enté boleh ngegandain atau nyetak ini cerita,  
selama enté kagak ngejualnya.

1

Dulu di tanah Israel, iduplah seorang lelaki nyeng namanya Manoah. Dia ama bininya kaga punya anak. Satu ari malekat Tuhan dateng kebininya Manoah. "Kamu bakalan punya seorang bocah nyeng hebat," bilangny.




2


Dia cerita sama lakinya soal berita nyeng hebat ini. Manoah sembahyang, "Ya Tuhanku...dateng lagi kepada kami. Dan ajarin kami apa nyeng kudu kami kerjain buat bocah kami itu."




3



Malekat bilang kepada Manoah, kalo anak itu kaga boleh ditetek rambutnya, kaga boleh minum-minuman keras, dan kaga boleh makan makanan nyeng dilarang. Tuhan udah milih anak ini jadi hakim. Dia bakalan mimpin Israel.




4




Udah pasti jamaah Tuhan butuh bantuan. Mereka ninggalin Tuhan, lantas mereka digangguin ama musuh mereka, orang Filistin. Tapi pas mereka sembahyang Tuhan denger. Dia ngirimin orok ini nyeng bakal jadi orang paling kuat di dunia.

5



Lantas perempuan itu ngebranakin seorang bocah laki-laki dan ngasih dia nama Samson. Bocah itu makin gede, dan Tuhan ngeberkatin dia. Atinya mulain digerakin ama Roh Tuhan. Samson jadi kuat banget. Satu ari dia bekelai ama singa muda pake tangannya dan dimatiinnya.

6



Lantas Samson nyicipin madu dari tawon nyeng nyarang bangke singa itu. Dia bikin tebak-tebakan: "Dari nyeng makan kluar makanan, dari nyeng kuat kluar nyeng manis."

7



Kaga ada nyeng bisa nebak artinya, tapi bini barunya Samson orang Filistin nyeritain ini sama temen-temennya. Ini bikin Samson marah banget.


8

Samson makin marah pas orang Filistin ngasih tau bininya biar jadi bini temennya. Dia ngerencanain bales dendam. Tapi pegimana caranya? Pertama-tama Samson nangkap tiga ratus anjing utan. Lantas dia iket buntutnya dua-dua, dan dia taro obor nyeng nyalah disela-selanya.




9

Lantas Samson ngelepas anjing-anjing utan itu ke kebonnya orang Filistin!




10

Sekarang orang Filistin pengen bales dendam. Samson ngebiarin dirinya ditangkep, diiket dan diserahin buat dibunuh orang Filistin.



11

Tapi Roh Tuhan kuasa atas Samson. Dia mutusin talinya, ngambil tulang mulut keledai mati, dan matiin serebu musuh.



12

Gerombolan orang Filistin nyariin Samson. Satu malem, mereka ngejebak dia di dalem kota dan dikonci gerbangnya. Tapi Samson jlan kluar manggul gerbang kota itu di pundaknya.




13

Tapi Samson kaga nurut ama Tuhan. Tuhan ngasih dia kekuatan selagi dia nurut. Satu ari, Samson nyeritain rahasia kekuatannya sama Delila, perempuan cakep mata-mata orang Filistin. Delila minta seseorang buat motong rambut Samson pas dia lagi pules.




14



Lantas tentara Filistin nyerang Samson di kamar Delila. Samson ngelawan-tapi kekuatannya udah ilang. Musuhnya nyongkel matanya. Buta dan loyo, Samson jadi budak orang Filistin. Mereka ngetawain sama ngeledekin pembantu Tuhan itu.

15


Orang Filistin ngadain pesta. Mereka muji-muji dewa ikan mereka, Dagon, nyeng udah ngasih Samson sama mereka. Mereka minum dan beseneng-seneng di kuil Dagon. Lantas mereka manggil Samson buat ngehibur mereka.



16

Seorang bocah laki-laki ngebawa Samson, dan ngebiarin dia nyender di tiang nyeng nunjang gedong itu. Di gedong itu ada tiga ribu orang Filistin di


atas gedong, dan lebih banyak lagi di dalem gedong, mereka semua pada ngeledekin.



17

Rambut Samson udah mulain pada numbuh lagi pas dia di dalem bui. Sekarang dia sembahyang, "Ya, Tuhan, bikin aku kuat sekali ini aja, ya Allah, biar aku

bisa bales dendam buat dua biji mataku."



18

Apa Tuhan bakal ngasih kekuatan lagi sama Samson? Apa bisa Samson ngelakuin hal nyeng mustahil? Iya! Iya! Samson ngedorong tiang nyeng berat dan kuat itu sebisanya. Gedong Dagon ngerakak rubuh, matiin rebuan orang Filistin ama Samson juga!



19

### Samson Orang Kuat Tuhan

Sebuah cerita dari perkataannya Tuhan, Alkitab

Ditemuin di

Hakim-Hakim 13-16

"Palang pintu Firman Engkau ngasih terang."  
Mazmur 119:130

20



Tamat

14



60

21

Ini cerita Alkitab nyeng nyeritain kita soal Tuhan kita nyeng keren, nyeng nyiptain kita ama pengen enté kenal Dia. Tuhan tau kita udah bikin hal-hal nyeng kaga bae, nyeng Dia sebut dosa. Hukuman dosa ya mati, tapi Tuhan sayang banget sama enté, Dia ngirim anaknya nyeng atu-atunya, Yesus, biar mati disalib dan dihukum karna dosa enté semua. Lantas Yesus idup dan balik lagi ke rumahnya ke Sorga. Kalo emang enté yakin ama Yesus dan minta biar Di maafin dosa-dosa enté, Dia bakalan ngelakuinnya! Dia bakalan dateng dan idup di dalem enté ini ari, dan enté bakalan idup ama Dia selamanya.

Kalo enté yakin ini kebenerannya, sautin ini ke Tuhan: Ya Yesus, ané percaya kalo Engkau itu Tuhan, dan berobah jadi manusia buat mati karna dosa ané, dan sekarang Engkau idup lagi. Tulung dateng kedalem idup ané sama maafin dosa-dosa ané, biar ané punya idup nyeng baru ini ari, dan entar bakalan pegih sama Engkau selamanya. Tulungin ané biar bisa nurutin Engkau dan idup buat Engkau ama anak Engkau. Amin.

Bacain Alkitab dan ngomong ke Tuhan tiap ari! Yohanes 3:16

22